

Morning Regional Dogri News Bulletin, 09th June 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. श्राष्ट्रपति द्रौपदी मुर्मू होर मनोमीत प्रधानमंत्री नरेन्द्र मोदी ते उंदे मंत्रिपरिषद गी अज्ज संजा सवा 7 बजे राष्ट्रपति भवन च औहदे ते राजदारी दी सगंध चकांगन।
2. जम्मू कश्मीर प्रशासनिक काउंसल नैबक्ख-बक्ख उद्योगिक इलाकें विकसित करने लेई 2 ज्हार 25 कनाल जिमीं मुंतकिल कीती। 1 ज्हार 750 कनाल जिमीं चनाह घाटी च बिजली विकास सरबंधी कंपनी गी पटे पर दित्ती गई।
3. पुलस महानिदेशक आर.आर.स्वैन होरें आखेआ ऐ जे जम्मू कश्मीर रमानदारी आला माहौल बनाई रखने लेई समाज विरोधी तत्वे कन्नै सख्ती कन्नै निबड़ना होग।
4. उपराज्यपाल मनोज सिन्हा होरें औंदी ईद-उल-अजहा ते माता क्षीर भवानी मेले लेई तैआरिणं दी समीक्षा कीती।

<><><><><><>

PM-Oath

राष्ट्रपति द्रौपदी मुर्मू होर मनोमीत प्रधानमंत्री नरेन्द्र मोदी ते उंदे मंत्रिपरिषद गी अज्ज संजा सवा 7 बजे राष्ट्रपति भवन च औहदे ते राजदारी दी सगंध दोआंगन। राष्ट्रपति होरें नरेन्द्र मोदी होरें गी सरकार दे गठन लेई साददा दित्ता ऐ। शुक्रवारें मोदी होरें राष्ट्रपति हुंदे कन्नै मलाटी लाइयै सरकार दे गठन दा दावा पेश कीता हा। बीजेपी दे अध्यक्ष जे.पी.नड्डा हुंदी अगुवाई च राष्ट्रीय जनतांत्रिक गठबंधन एनडीए दे शिष्टमंडल नै राष्ट्रपति हुंदे कन्नै मलाटी कीती ते नरेन्द्र मोदी होरें गी बीजेपी संसदीय दल दा नेता चुने जाने सरबंधी पत्र सौंपेआ। एनडीए दे सैहयोगी दले दे समर्थन पत्र बी राष्ट्रपति होरें गी सौंपे गे। साढे संवाददाता नै जानकारी दित्ती ऐ जे केई सारे गोआंढी मुल्खें दे नेताएं गी इस समारोह लेई साददा दित्ता गेआ ऐ। समारोह च भारत दे गोआंढी मुल्खें हिंद महासागर क्षेत्र दे नेता ते होर दुए मन्ने परमन्ने दे लोक शामिल होंगन। इंदे च श्रीलंका दे राष्ट्रपति रानिल विक्रमसिंघे, मालदीप दे राष्ट्रपति मोहम्मद मुइज्जू, सेशेल्स दे उपराष्ट्रपति अहमद अफीफ, बंगलादेश दी प्रधानमंत्री शेख हसीना, मॉरीशस दे प्रधानमंत्री प्रविंद कुमार जुगन्नाथ, नेपाल दे प्रधानमंत्री पुष्प

कमल दहाल 'प्रचंड' ते भूटान दे प्रधानमंत्री शेरिंग तोबगे शामिल न। तोआई नरेन्द्र मोदी होरें अज्ज बडलै 7 बजे राजघाट जाइयै महात्मा गांधी होरें गी श्रद्धांजलि अर्पित कीती। एहदे परैत सवा 7 बजे ओह सदैव अटल स्थल पर गे ते अटल बिहारी वाजपेयी होरें गी श्रद्धांजलि दित्ती। मगरा साढ़े 7 बजे उनें युद्ध स्मारक जाइयै शहीदें गी श्रद्धांजलि अर्पित कीती।

<><><><><><><><>

Live Swearing

आकाशवाणी राष्ट्रपति भवन च लगने आले शपथ ग्रहण समारोह दा सिद्धा प्रसारण करोग। एह प्रसारण संजा 6 बज्जियै 45 मिंटे थमां आकाशवाणी दे एफ.एम.गोल्ड, इंद्रप्रस्त ते आकाशवाणी लाईव न्यूज़ चैनल पर कीता जाग। एह कार्यक्रम आकाशवाणी दे यू-ट्यूब चैनल पर बी कन्नो कन्नी प्रसारत कीता जाग।

<><><><><><><><>

Adm. Council Decisions

उपराज्यपाल मनोज सिन्हा हुंदी प्रधानता तैह्त कल लग्गी दी प्रशासनिक काउंसल दी बैठका दरान बडगाम, अनंतनाग, शोपियां ते रियासी जिलें च औद्योगिक एस्टेटें दे विकास लेई 2 ज्हार 25 कनाल ते 3 मरले जिमीं मुंतकिल करने दी मंजूरी दित्ती गई ऐ। प्रशासनिक काउंसल नै किशतवाड़ जिले दी नागसेनी तैहसील दे गलहार भाटा ग्रां च कीरू पनबिजली परियोजना लेई 1 ज्हार 750 कनाल 17 मरले जिमीं 40 ब'रें लेई पट्टे पर चनाह वैली पॉवर प्रोजेक्टें प्राइवेट लिमिटेड गी देने दा बी फैसला लैता ऐ। इक होर फैसले तैह्त प्रशासनिक काउंसल नै श्रीनगर दी टाटू ग्राउंड च 199 एकड़ शा मती जिमीं पर मनोरंजन पार्क विकसित करने लेई विशेष स्पेशल पर्पस व्हीकल लेई भारत सरकार गी प्रदेश सरकार दी सैहमति जताने दा बी फैसला कीता गेआ ऐ। इस पार्क दे राएं प्रदेश च सैलसफा गी खरा मता बढावा थ्हाग ते इस पैहलकदमी गी केन्द्र सरकार दे सैहयोग कन्नै तोड़ चाढ़ेआ जाग। एहदे राएं राजस्व ते रोजगार च बी बाद्धा होग।

<><><><><><><><>

DGP-Tough

जम्मू कश्मीर पुलसा दे डरैक्तर जनरल आर.आर.स्वैन होरें आखेआ ऐ जे कनून नाफिज करने आली अजेंसिएं गी समाज विरोधी तत्वें खलाफ सख्त कारवाई करनी पौंदी ऐ तां जे इस गल्लै गी जकीनी बनाया जा जे जम्मू कश्मीर च बने दे रमानदारी आले म्हौल च खलल नेई पवै। कल पुलवामा च इक जनता दरबार गी संबोधत करदे होई डीजीपी होरें आखेआ जे जिसलै रमानदारी होग तां चुनाएं गी बी रमानदारी कन्नै करोआया जाई सकदा ऐ। उनें आखेआ जे पुलस बल रमानदारी आला म्हौल बरकरार रखना चांहदा ऐ ते एहदे लेई केई बारी

उनेंगी बरोध दा सामना बी करना पौंदा ऐ, पर म्हौल गी शांतिपूर्ण बनाई रखने लेई किश लोकें खलाफ सख्ती बरतनी गै पौंदी ऐ। उनें आखेआ जे हाल च गै प्रदेश च लोकसभा दे चुनाएं गी रमानदारी कन्नै करोआया गेआ ते लोकें बी बधी-चढ़िये वोट पाने दे अपने हक्कै दा इस्तेमाल कीता। डीजीपी होरें गलाया जे प्रदेश च मकामी आतंकवादिएं दी गिनतरी लगातार घटै करदी ऐ ते प्रदेश च सरगर्म विदेशी आतंकवादिएं दी गिनतरी हुन 70 शा 80 दे दरमेयान ऐ। डीजीपी होरें आखेआ जे छड़े किश मुट्ठी भर लोक इनें आतंकवादिएं गी आसरमे उपलब्ध करोआंदे न ते इस करिये पुलस नेह लोकें खलाफ सख्त कारवाई करोग तां जे होर आम लोक सुरक्षत रौहन।

<><><><><><>

J&K Employees

जम्मू कश्मीर दी सरकारै राष्ट्र-बरोधी गतिविधिएं च मुलव्वस पाए गेदे 4 सरकारी मलाजमें गी कल भारती संविधान दी दफा 311 तैहत नौकरी शा बर्खास्त करी दित्ता ऐ। इंदे च 2 जने जम्मू कश्मीर पुलस च कांस्टेबल जिसलै के इक जना शिक्षा विभाग च अध्यापक ते इक जल शक्ति विभाग च असिस्टेंट लाइनमैन हा। कनून नाफिज करने आली अजेंसिएं सनें खूफिया अजेंसिएं बी इनें मलाजमें दिएं गतिविधिएं पर लगातार तक्क रखी दी ही।

<><><><><><>

Sonia Gandhi

कांग्रेस दियां वरिष्ठ लीडर सोनिया गांधी होरें गी कांग्रेस पार्लिमानी पार्टी दी अध्यक्ष चुनी लैता गेआ ऐ। कल संजा मीडिया कन्नै गल्ल करदे होई पार्टी दे नेता राजीव शुक्ला होरें दस्सेआ जे उनें इस औहदे गी स्वीकारने दी गुजारश मन्नी लैती ऐ। एहदे शा पैहले कांग्रेस कार्ज समिति नै आम सैहमति कन्नै पास कीता गेदा राहुल गांधी होरें गी लोकसभा च विपक्ष दा नेता बनाए जाने दा प्रस्ताह रखेआ। प्रेस कांफ्रेंस गी संबोधत करदे होई पार्टी दे वरिष्ठ लीडर के.सी.वेणुगोपाल होरें आखेआ जे कांग्रेस दी कार्ज समिति दा मन्नना ऐ ते राहुल गांधी हुंदी अगुवाई विपक्ष गी निग्गर ते सशक्त बनाग।

<><><><><><>

LG-Arrangements

उपराज्यपाल मनोज सिन्हा होरें कल इक उच्ची सतह दी बैठक दी अध्यक्षता करदे होई माता क्षीर भवानी दे सलाना मेले ते ईद-उल-अजहा लेई बक्ख-बक्ख मैहकमे दिएं तैआरिं दी समीक्षा कीती। उपराज्यपाल होरें सब्बने डिप्टी कमीशनरें ते पुलसै दे एसएसपीएं गी निर्देश दित्ता जे ओह इनें आयोजकें आलिं धार्मिक थाहरें दे सुरक्षा ते होरने बंदोबस्तें गी जकीनी बनाने लेई आखेआ तां जे बक्ख-बक्ख मैहकमे दे सैहयोग ते आपसी तालमेल कन्नै एह महत्वपूर्ण ध्यार पूरी चाल्ली रमानदारी ते बवस्था आले ढंगै सिर तोड़ चढ़ी सकन। सिन्हा होरें सरबंधत मैहकमे दे अफसरें गी क्षीर भवानी मेले ते ईद समारोहें दरान बिजली, पानी, सेहत सुविधाएं, अगग ते अपात स्थितिं, साफ सफाई, गडिडएं दी आओजाई, पार्किंग ते होरने प्रबंधें गी पैहले थमां करी रखने पर जोर दित्ता।

<><><><><><>

Road Amarnath Yatra

शिड़कें इमारतें सरबंधी मैहकमे दे सचिव भूपेन्द्र कुमार होरें कल रामबन जिले दा व्यापक दौरा लाइयै जम्मू श्रीनगर राष्ट्रीय जरनैली सड़कै पर औंदी अमरनाथें दी यात्रा दी पछोकडै च सड़कें दी मरम्मत ते रख-रखाव दे कम्में दा जायजा लैता। आकाशवाणी दे जम्मू संवाददाता नै जानकारी दितती ऐ जे सचिव होरें नाशरी कोला रामबन ते रामबन कोला बनिहाल तोड़ी दे हिस्से पर सड़कै गी चैड़ा करियै कन्नो कन्नी चरुं गडिडएं दे लंघने जोग बनाने दे कम्में दा मुआयना कीता। उनें कम्में गी तोड़ चाढ़ारदिं सरबंधत अजेंसिं गी निर्देश दित्ता जे अमरनाथें यात्रिं, सैलानिं ते सड़कै दा इस्तेमाल करने आले बाकी सारे लोकें दी सुरक्षा ते सुरक्षत बवास्थित ते सुविधाजनक यात्रा गी जकीनी बनाने लेई एनएच-44 दे रख-रखाव गी सब्बने शा पैहली तरजीह दित्ती जा। उनें नाशरी कोला बनिहाल तोड़ी दे हिस्से पर सड़कै गी चैड़ा करने दे कम्में च तेजी आनने पर बी जोर दित्ता।

<><><><><><>

Amarnath Yatra Udhampur(byte)

उधमपुर जिले च इस ब'रे दी श्री अमरनाथ जी दी यात्रा पर औने आले श्रद्धालुएं दे सुआगत लेई कोई साढ़े त्रै सौ फ्लैक्स इश्तेयार लाने दी तैआरी ऐ, जिंदे पर उंदा सुआगत, मार्गदर्शन ते जरूरी हिदायतें दे कन्नै श्री बाबा अमरनाथें दे चित्र बी होंगन। एह इश्तेयार जिले च जम्मू श्रीनगर राष्ट्रीय जरनैली शिड़क ते उधमपुर शैहरा दे बक्ख-बक्ख हिस्से च लाए जा करदे न। होर मती जानकारी कन्नै साढ़े संवाददाता अचिन दूबे.....बाईट

<><><><><><>